

Inkanda inda Yoane inda isato

1 Engambe ele Ngayo bolangami bonami, bondokemi lolango londa soosolo.

2 We bolangami bonami, emi nanga we yonga nda baoi bandawe bauma shene elongawe nda baoi banda botema. 3 Emi ndolekola dishashala aki baina bandiso ayakaka la akiyo atosangelaka bosako bonda baoi bandawe la shene ekiwe akambaka nda baoi banda soosolo la shene ekendawe nda soosolo. 4 Emi mpoyadi la bosadu bolecola bone dinda yoka mbo, Bana banami bayadi dikendaka nda baoi banda soosolo. 5 Bolangami bonami, we ombokamba bolimo bonda dikotomedia akiwe atanaka bana banda nyango o la baphaya. 6 (baiko baosakola bosako bonda diyota dindawe nd'oso bonda Ekelezia,) we okelaki bolotshi nda yatshindedya na nkendo indiyo shene elanga Nkumundjeyi. 7 La boloko bonda iyo bakendaki nda dina dinandi, batimedye emba m'ele basi benanga. 8 Sheko diyadi la isho yamba baiko la bosadu dinda isho diyala bankambi bandiyo nda djoji dinda soosolo. 9 Emi ndokotela Ekelezia bonkanda, aye, Diyotophele ondolanga yaphemela banto, apholangi ditaamba. 10 Nda ditshina dine, nkina ndokoyakalomi, ndokophwa bekeledi benandi bekelandi, la baoi batephelandi; aye apha phe nko shiko, andi o mele aphambi baina bandiso, ko andi ayadi disukaka baiko balanga yaamba, la andi yakimaka ma Ekelezia.

11 Inyo balangami anami, lotokolaka baoi an'embe, aye lokelaka baoi banda bolotshi. Bonto bondokela baoi anda bolotshi ayadi m'ele Nkumundjeyi. Bonto ondoyadi dikelaka baoi ban'embe ateni Nkumundjeyi. 12 Banto bankuma bayadi disakolaka bosako bonda Demetelio mbo, Bolotshi; o la djoji inda soosolo diko mele, o la isho mele toyadi disakolaka bosako bonandi; la we yeyaka mbo, Bosako bondiso boyadi o soosolo.

13 Emi ndjaki la baoi phala banda dikotela, aye mpoyokokotela baoi baiko la bashi banda bonkanda la lokola: ndolindedya dikena lako elengi, ko tokophulula borumvu la borumvu. Tosoke tondiso baokodinga. Otodingeli tosoke tondiso la dina la dina.